

Den reunion cu Gobierno trahadornan no a haya informacion

NI NA HULANDA TA CONOCI KICO LO PASA CU GOLDEN TULIP

Pregunta grandi pa tur hende: Pakico despues di di 1989 hotel a basha abao?

ORANJESTAD (AAN): Informenan ta indica cu te ainda ta reina incertidumbre cerca trahadornan di Golden Tulip pa motibo cu ainda nan no a haya claridad entorno e situacion di e hotel y loke futuro lo encera.

Aparentemente e reunion cu FTA a sostene Diaranzon cu Gobierno no a duna e resultadonan concreto cu tabata worde spera. Informantenan a bisa cu Gobierno no por a duna e representacion di trahadornan ningun contesta concreto.

E situacion aki ta trece cune cu e incertidumbre cerca trahadornan ta sigui manifesta su mes pasobra e trahadornan aki no ta na haltura kico por spera nan ni siquiera den e futuro cercano.

Gobierno no sa kico ta bay pasa cu Golden Tulip ni despues di a papia cu Hulanda. Esaki ta algo logico segun informantenan pasobra na Hulanda tampoco ta conoci kico ta bay socede. Aparentemente ni na e re-

gionnan mas halto di Golden Tulip mes tin claridad en cuanto futuro di e hotel cu a worde permiti di ta agoniza.

DIARIO cu a presencia e gran apertura di Golden Tulip ta conciente con añanan 1988 y 1989 tabata añanan di gloria pa e hotel cu a traha duro di antemano pa e resultadonan aki. Te awe ningun instancia (cu no ta Gobierno) por bisa kico a socede cu despues di 1989 Golden Tulip a cumenza basha abao. Su casino a worde cera y poco e hotel a cumenza degradar.

Ni gerencia ni personal por worde tuma responsable pa loke a pasa. Informenan di tur banda ta papia di un bon relacion entre gerencia y trahadornan cu hunto ta pasa den temponan increible. "Nos ta trata di haci loke nos por haci ainda. Pero e inseguridad ta axfixia tur hende" un informante a bisa.

E hotel ta sigui opera y hasta ta haci reservacionnan pa futuro. Gruponan pa 1993 y hasta 1994 ta worde ge-

booked. Pero e tempo ey ainda lo papia di Golden Tulip? Ningun hende sa!

E ambiente di trabao no solamente ta marca pa inseguridad pero tambe ta sumamente dificil. Turistanan ta haci pregunta y ta entrega reclamo. Un pareha cu a escohe Golden Tulip pa pasa su luna de miel a entrega reclamo na e agente di viahe pasobra e casino ta cera.

Hopi persona cu ta viaha cu mucha no kier bandona e hotel caminda nan ta hospeda den horanan di anochi. Nan tin miedo di bay laga e muchanan so den hotel y si nan por bay restaurantnan y casino den e hotel constantemente nan por bay tira vista ariba nan yuinan. Ora e personanan aki yega y resulta cu no tin casino problema ta cumenza. Cu tur e problemanan cu nan mes tin; gerencia y personal mester trata di

apacigua turistanan y trata di bisa cu e casino lo bolbe habri pa asina evita mas daño na e hotel.

Golden Tulip a basha abao na un forma misterioso mescos cu henter turismo di

Aruba a sali for di un futuro briyante pa enfrenta un futuro dudoso. Aruba ta paga e cuenta di un maneho gubernamental di ultimo añanan cu tabata solamente dirigi ariba venganza.